

古調集

古詩

秋夜有懷兼寄兄

秋韻臨夜喚幽人，攜酒東天冰一輪；百代清輝未少減，誰能與之共青春。
嫦娥不解人間語，孤高拒作酒徒鄰；俗塵自有俗塵趣，欲辯難喻天上民。
富豪輕擲金銀樂，我得閒情未是貧；君在海外遙相伴，持杯千里慰交親。
且惜瓊漿今宵滿，同看明月萬古新。

北極春風歌

北極一夜起春風，千樹梨花盡銷融；萬仞玄冰愁不結，更藉何處棲白熊。
風吹三日冰山倒，遍地驚見青青草；杜鵑啼暮靄芳原，雪狐懼暖形枯槁。
冰解百呎海一丈，須臾水凌青天上；卜居莫作近濱民，汪洋巨濤終相望。
春風何故北極邊，此事由人不由天；若對環保心不惜，試看北極春風篇。

春江花月夜（藏頭詩）並序

自幼極愛張若虛「春江花月夜」之詩，後至日本京都清水寺錦雲溪畔旅遊，時為櫻花盛開之際，一時興起試做，雖自愧才所不及，但以此自娛亦無不可，以「春、江、花、月、夜」五字作藏頭詩。

春江水月溶光彩，瀲灩逐波東入海；天上一回春月圓，人間幾度山河改。
江源何夕起春潮，一帶清光凝紫綃；不識芳菲春爛熳，等閒花月總無聊。
花心飄泊隨江水，香斷粼粼千萬里；潭中孤月去年春，江畔離人今夜意。
月湧晴川高炯林，良宵誰共醉花陰；探春遊子天涯遠，盼月情懷海角深。
夜月春江流不住，澄輝皎練依然故；可憐花事散春煙，輾轉相思無覓處。

阿富汗戰爭十年

十載戰爭阿富汗，群黎家破惟逃竄；乾坤流血半瘡痍，沙漠無情悉怨嘆。
黃磧謀生覓地雷（註），孩童十去九殘回；燃天烽火朝朝起，失恃孤兒夜夜哀。
砲響轟轟驚夢碎，難民兵士兩憔悴；衣凝污血更含愁，面帶傷痕猶有淚。
雲間冷月須惆悵，照見曝屍無處葬；四海同為骨肉親，忍能霜刃紅相向。
動地殺伐何日空，不復槍林彈雨中；百姓長離爭戰苦，兒童歡語沐春風。

※ 註：阿富汗的孤兒每每為了生計，都必須尋找埋在沙漠中的地雷以換金錢，因此誤觸地雷死傷的兒童不計其數。

拉拉山桃花詩

東風暖樹葉萋萋，嶺上霞光紅鋪陳；交通阡陌香瀰漫，處處桃花處處春。
一般顏色兩手神，簾外桃花簾裡人；人來花下依嬌笑，花面相映看不真。

夭夭艷盛落仍頻，清流婉轉自逡巡；莫辭千里塵間去，分付漁人好尋津。

買書

開卷有益足欣然，偷閒書局長流連；買書者眾觀者寡（註），好詩風雅更滴涓。
藏書無力破三千，奇文喜覽一百篇；青衿不解書中趣，匏匱吞棗亦可憐。
人道閱讀利何邊，豈唯廩粟美嬋娟；但對韋編有微願，阮囊未少買書錢。

※據調查指出，台灣人購書率大於實際閱讀率，本句即指此而言。

七律

2008 年元旦作

節氣仍餘臘月痕，東風何日入東門；吟成修竹窗猶綠，賦罷新詩手亦溫。
汲古書中思有味，犯寒花下客銷魂；羲和鞭指西山盡，珍重斜陽將又昏。

中秋登高賞月

櫺樓高掩望應難，且向山林覓所觀；一夕銀輝涵宇宙，三秋月色滿長安。
星臨野曠塵囂遠，雲傍巔危玉壁寒；好夢良宵當惜取，團圓不待五更殘。

賀良政老師退休

聞今退職臥春眠，院似山林人似仙；鬚鬢高涵冰雪志，精神頤養柏松年。
朝來燕雀馴棲樹，夕去塵心靜坐禪；來日定從公對住，桃源已近在門前。

秋思

寒蟾泣露浸膚涼，閑坐幽齋裊桂香；昨日相思猶七夕，今宵不覺已重陽。
歸來方悟淵明樂，搖落休隨宋玉傷；漸起秋風涎欲滴，堪肥紫蟹凍橙黃。

雨中紗帽山

階漬宿霖濡未乾，今晨登岳亦洑瀾；稠林葉響千山雨，陰岫雲流百尺湍。
攻頂愁隨嵐霧淡，展眉心逐海天寬；問誰多事封紗帽，自在青山懶作官

上班途中逢霧

時移仲夏未爲寒，誰蓋白裘千丈寬；街影重重迷撲朔，車形隱隱辨艱難。
濃如失楫湖中墜，淡似遊仙雲際看；待到校門心亦足，堪驚險歷有餘歡。

下大屯南峰

鱸膾暫拋偕友卿，金風連日動遊情；露凝紅樹春光豔，霜降碧溪秋色清。
芳草潤邊香暗遞，繡羽枝上囀歡迎；歸途休道崎嶇甚，踏盡人間路不平。

絹絲瀑布

層巒何處匿蠶眠，漫吐絹絲蒼壁前；不共長川爭壯麗，獨居幽谷事纖妍。
瑤臺鏡裡嬋娟子，姑射山頭冰雪仙；寄語東風須裊裊，莫教吹逝散如煙。

象山步道

象山西陸景佳新，溽暑消沉宜往頻；嫩蕨蔽穹舒鳳尾，老槐迴日映龍鱗。
風輕緩步安蹊磴，旻逸清啼羨鳥身；俯瞰京華千廣廈，終年汲汲是何人。

清水寺郊縱馬（註）

少年情性愛荒唐，放縱驅馳任四方；幽徑淺敷春草綠，落花閑蹴馬蹄香。
夕陽山外雲瑰麗，清水寺中心淨涼；良夜晚歸還秉燭，乘風遊遍月如霜。

※註：「清水寺」位於京都市東山區，是關西香火最鼎盛的廟宇之一

清明

天階散朗弄新晴，更裏春盤祭掃征（註）；綠滿園蕪寒食雨，紅焚銀紙後人情。
無家荒塚蓬蒿沒，有韻風光郊野行；渺渺黃泉須縱樂，一生看得幾清明。

※註：「春盤」即春捲古名，古時將麵粉製成的薄餅攤在盤中，加上精美蔬菜食用，故稱「春盤」。

偕友人至平溪放天燈

元夕清寒未寂寥，平溪好趁鬧元宵；山城旖旎春華近，燈影參差星夢遙。
冀願拳拳同昨歲，風塵僕僕奮明朝；他鄉遊子齊相勉，莫類秋蓬任轉飄。

七絕

九份冬雨二首

其一

石徑條條通昊碧，燈籠戶戶綻宵紅；山城豈是無晴處，一半風光在雨中。

其二

滿街花傘擎簷雨，一碗芋圓溫手春；景貌依稀非昨日，去年天氣去年人。

中秋

天幽雲散溢清光，輪轉無聲輾夜長；歲歲中秋容易過，又看明月在他鄉。

歸家偶經菜花田

老樹鳴蟬張鴨綠，菜花偕趣秀鵝黃；茸茸金蝶趨童稚，飛向田畦何處藏。

嘉大圖書館池畔

雲月初光清絕塵，杜鵑香散滿庭春；池蛙喧噪憐宵靜，旋作無聲知有人。

合歡山降雪

捲地北風翻白沙，皚皚添韻缺梅花；當年詠絮人安在，飄落難尋舊謝家。

台南竹溪寺

心靜寺鐘閑紫煙，竹溪春曉醉花邊；獨無親舊陪今日，唯有風流似去年。

慈母

甫卸嫁衣猶畫眉，心牽襁褓懶修儀；玉肌無怨皺紋滿，磨盡青春知爲誰。

奧萬大楓葉

一片絳紅千萬山，露凍霜摧亦等閒；天上神仙如偶見，恐疑春色返人間。

無題

長生應悔竊仙丸，枯守霜風泣廣寒；心澀怕人譏寂寞，團圓更與世間看。

聽小田和正「言葉にできない」(中譯：無法言喻)

歌發婉清塵慮休，踏行花影月優游；人心若植櫻千樹，一曲東風萬里柔。

病中

寥落此身秋後葉，孤燈思緒亂如雲；東坡詩句吟寒榻，慰病靈丹許此君。